

Na osnovu člana 26. Statuta Radio-novinske i izdavačke ustanove „Radio Brčko“ Brčko distrikt Bosne i Hercegovine, Upravni odbor Radio-novinske i izdavačke ustanove „Radio Brčko“ na 8. vanrednoj sjednici održanoj 29.12.2021. godine donosi:

**PRAVILNIK
O UTVRĐIVANJU RAČUNOVODSTVENIH POLITIKA
RADIO-NOVINSKO I IZDAVAČKE USTANOVE "RADIO BRČKO" BRČKO
DISTRIKT BiH**

OPŠTE ODREDBE

Član 1.

Ovom Odlukom utvrđuju se računovodstvene politike za Radio-novinsku i izdavačku ustanovu „Radio Brčko“ Brčko distrikt BiH (u daljem tekstu: RNU „Radio Brčko“), u skladu sa:

- Zakonom o računovodstvu i reviziji u Brčko distriktu Bosne i Hercegovine («Službeni glasnik Brčko distrikta BiH» br. 22/16 i 50/18),
- Zakonom o budžetu Brčko distrikta BiH («Službeni glasnik Brčko distrikta BiH» br. 34/08, 40/15 i 39/17),
- Međunarodnim računovodstvenim standardima.

Član 2.

Računovodstvene politike odnose se na priznavanje, mjerjenje i procjenjivanje:

- Nekretnina, postrojenja i opreme;
- Zaliha;
- Gotovine, kratkoročnih potraživanja i razgraničenja;
- Izvora sredstava;
- Dugoročnih obaveza i razgraničenja;
- Kratkoročnih obaveza i razgraničenja;
- Rashoda;
- Prihoda;
- Vanbilansne evidencije;
- Fundamentalnih grešaka i
- Napomena uz finansijske izvještaje.

Član 2.

Priznavanje prihoda i primitaka, rashoda i izdataka vrši se po modifikovanim računovodstvenim načelima nastanka događaja. Prihodi se evidentiraju u periodu u kojem postaju raspoloživi i mjerljivi, a rashodi se priznaju u trenutku nastanka obaveze bez obzira kada se vrši plaćanje.

NEKRETNINE, POSTROJENJA I OPREMA

Član 3.

Nekretnine, postrojenja i oprema su materijalna sredstva koja RNU "Radio Brčko" drži radi upotrebe pri obavljanju vlastitih aktivnosti, za koja se očekuje da će se upotrebljavati duže od jednog izvještajnog perioda.

Član 4.

Stavku nekretnina, postrojenja i opreme treba početno odmjeravati po njenom trošku nabavke. Kada je sredstvo stećeno bez naknade, trošak njegovog pribavljanja čini fer vrijednost na dan sticanja.

Nabavna vrijednost pojedinačne stavke nekretnina, postrojenja i opreme sastoje se od njegove nabavne cijene, uvoznih dadžbina, poreza na dodanu vrijednost i troškova dovođenja sredstva u stanje funkcionalnosti, trgovinski popusti i rabati oduzimaju se od nabavne cijene.

Član 5.

Nabavka nekretnina, postrojenja i opreme može se izvršiti ako je stavka ovog kapitalnog rashoda usvojena u tekućem finansijskom planu RNU "Radio Brčko".

Član 6.

Nabavka nekretnina, postrojenja i opreme može se vršiti iz sljedećih izvora:

- sopstvenih prihoda;
- primljenih kapitalnih transfera;
- priliva novčanih sredstava ostvarenih prodajom stalnih sredstava i
- primljenih donacija u stalnim sredstvima.

Član 7.

Ispravka vrijednosti stalne imovine vrši se na teret rashoda amortizacije.

Obračunski otpis (amortizacija) se vrši linearnom metodom, primjenom godišnjih stopa amortizacije iz Pravilnika o knjigovodstvu i računovodstvu RNU "Radio Brčko".

Sredstva čija je nabavna vrijednost u trenutku nabavke niža od 250,00 KM svrstavaju se u sitan inventar i otpisuju jednokratno, nezavisno od vijeka trajanja.

Obračunu amortizacije ne podliježu zemljište i sredstva u pripremi.

ZALIHE

Član 8.

Zalihe su sredstva u obliku materijala koji će biti utrošeni u toku obavljanja poslovne aktivnosti RNU "Radio Brčko":

- sitan inventar,
- rezervni dijelovi (računari i oprema),
- kancelarijski materijal i
- materijal za održavanje higijene.

Član 9.

Zalihe treba odmjeravati po nižoj od sljedeće dvije vrijednosti: cjeni koštanja ili neto ostvarljivoj vrijednosti, (neto ostvarljiva vrijednost je procijenjena prodajna cijena, umanjena za procijenjene troškove neophodne za realizaciju prodaje, razmjene ili distribucije).

Član 10.

Troškovi nabavke zaliha obuhvataju nabavnu vrijednost i ostale troškove vezane za nabavku: poreze, uvozne dadžbine, transportne i manipulativne troškove i druge troškove koji se mogu direktno pripisati pribavljanju gotove robe i materijala. Trgovački popusti i rabati oduzimaju se prilikom utvrđivanja troškova nabavke.

Nabavka sitnog inventara i rezervnih dijelova tereti rashode za iznos ukupnih troškova nabavke. Ne vrši se djelimična ispravka zaliha na nivo neto prodajne vrijednosti, jer knjigovodstvena vrijednost tih zaliha ne postoji.

Iznos bilo kog otpisivanja zaliha do neto ostvarive vrijednosti i svi gubici zaliha priznaju se kao rashod perioda u kome se vrši otpisivanje ili nastane gubitak.

GOTOVINA, KRATKOROČNA POTRAŽIVANJA I RAZGRANIČENJA

Član 11.

Gotovinu predstavljaju novčana sredstva na depozitnim računima po viđenju i u blagajni.

Domaći novac u blagajni, na računima i podračunima iskazuje se u nominalnom iznosu, a strani novac po kursu Centralne banke na dan sastavljanja finansijskog izvještaja.

Član 12.

Kratkoročna potraživanja su potraživanja koja dospijevaju za naplatu u roku od godinu dana od dana nastanka potraživanja.

Procjenjivanje kratkoročnih potraživanja vrši se po nominalnoj vrijednosti uz primjenu načela niže vrijednosti, ako se pri pojedinačnoj proceduri utvrdi da je očekivana naplata niža od visine potraživanja.

Otpisivanje se vrši preko ispravke vrijednosti za sumnjiva i sporna potraživanja, odnosno direktno

za zastarjela potraživanja, na teret rashoda tekućeg perioda, odnosno na teret suficita ili deficit, ukoliko je za potraživanje odobren prihod ranijih perioda.

Član 13.

Kratkoročne plasmane predstavljaju potraživanja po datim kratkoročnim kreditima čiji je rok dospijeća do godinu dana od dana plasiranja, kao i plasmani sredstava grantova čija ugovorena obaveza po plasmanu traje do godinu dana.

Procjenjivanje kratkoročnih plasmana vrši se po nominalnoj vrijednosti uz primjenu načela niže vrijednosti, ako se pri pojedinačnoj proceduri utvrdi da je očekivana naplata niža od visine potraživanja.

Otpisivanje se vrši preko ispravke vrijednosti za sumnjiva i sporna potraživanja, odnosno direktno za zastarjela potraživanja, na teret suficita ili deficit, ako je izvršena doznaka sredstava. Ako doznaka sredstava nije izvršena otpisivanje se vrši na teret i u korist sumnjivih i spornih potraživanja.

Član 14.

Procjena nadoknadivosti kratkoročnih plasmana i potraživanja vrši se najmanje jednom godišnje.

Član 15.

Pod procjenom nadoknadivosti podrazumijeva se klasifikacija dugoročnih i kratkoročnih plasmana i potraživanja u sljedeće kategorije:

- Kategorija A – nema neizvjesnosti u pogledu naplate;
- Kategorija B – aktiva sa potencijalnim slabostima;
- Kategorija C – aktiva sa izraženim slabostima;
- Kategorija D – sumnjiva aktiva;
- Kategorija E – gubitak.

Klasifikacija aktiva obavlja se uzimanjem u razmatranje svih faktora vezanih za korisnikove osobine i njegovu sposobnost plaćanja.

IZVORI SREDSTAVA I FINANSIRANJA

Član 16.

Izvori stalnih sredstava nemaju rok dospijeća i raspoloživi su RNU "Radio Brčko" na neodređeno vrijeme.

Izvori finansiranja RNU "Radio Brčko" su:

- budžet Brčko distrikta BiH;
- vlastiti prihodi

U slučaju da je akumulirani višak prihoda nad rashodima iz ranijih godina manji od viška rashoda nad prihodima izvještajne godine, razliku uplaćuje osnivač Brčko distrikt BiH.“

DUGOROČNE OBAVEZE I RAZGRANIČENJA

Član 17.

Dugoročne obaveze predstavljaju obaveze koje dospijevaju u roku dužem od godinu dana od dana nastanka obaveze.

Sredstva i izvori sredstava primljeni po posebnim zakonskim propisima mogu se kratkoročno razgraničavati.

KRATKOROČNE OBAVEZE I RAZGRANIČENJA

Član 18.

Kratkoročne obaveze dospijevaju za izmirenje u roku kraćem od godinu dana od dana nastanka obaveze.

Obaveze prema zaposlenim i obaveze prema dobavljačima uvijek se smatraju kratkoročnim obavezama, bez obzira kada dospijevaju na plaćanje.

Sredstva i izvori sredstava primljeni po posebnim zakonskim propisima mogu se kratkoročno razgraničavati.

RASHODI

Član 19.

Rashodi i izdaci se knjiže po obračunskoj osnovi, odnosno u periodu kada je obaveza za plaćanje nastala, bez obzira da li je izvršeno i samo plaćanje.

Obaveza se knjiži u mjesecu u kojem je nastala, bez obzira na dan plaćanja.

Amortizacija tereti rashode samo u slučaju ako su sredstva amortizacije sadržana u donaciji.

Član 20.

U slučaju kada se u finansijskom izvještaju iskaže višak rashoda nad prihodima, Upravni odbor RNU “Radio Brčko” u idućoj godini donosi odluku kojom se višak rashoda nad prihodima pokriva na teret viška prihoda nad rashodima iz ranijih godina.

PRIHODI

Član 21.

Prihodi i primici se priznaju u računovodstvenom obračunskom periodu u kojem su mjerljivi i raspoloživi.

Član 22.

Transferi se priznaju kao prihod ako su primljeni za izmirivanje obaveza po osnovu tekućih rashoda, a ne za kapitalne svrhe.

Ako je transfer primljen u jednoj fiskalnoj godini za izmirivanje obaveza koje će nastati u narednim fiskalnim godinama, odgovarajući dio transfera se tretira kao razgraničeni (odgođeni) prihod.

Član 23.

U slučaju kada se u finansijskom izvještaju iskaže višak prihoda nad rashodima, isti se knjiži na akumulirani višak prihoda ranijih godina.

VANBILANSNA EVIDENCIJA

Član 24.

(1) Vanbilansna evidencija; evidentiraju se poslovni događaji koji nemaju direktnog uticaja na sredstva i izvore sredstava, već samo otvaraju mogućnost za takve uticaje u budućnosti.

(2) Na računima vanbilansne evidencije evidentiraju se sredstva i izvori sredstva koji su značajni a ne nalaze se u bilansu.

(3) Poslovni događaji iz stava (1) ovog člana su: primljene i date garancije i mjenice, odobreni, a ne povučeni krediti, nabavljene, a neprodate taksene marke i dr.

(4) Knjiženje se obavlja tako što se na kontima glavne kategorije 910000 – Vanbilansna evidencija uslovnih potraživanja vrši terećenje, a u korist konta glavne kategorije 950000 – Vanbilansna evidencija uslovne obaveze.

(5) Konta vanbilansne evidencije zatvaraju se kada prestane uslovno potraživanje, odnosno uslovna obaveza.

FUNDAMENTALNE GREŠKE

Član 25.

Fundamentalnim greškama smatraju se greške u pripremi finansijskih izvještaja jednog ili više prethodnih perioda, a koje su otkrivene u tekućem periodu.

Iznos ispravke fundamentalne greške koja se odnosi na prethodne periode, treba objelodaniti uskladišnjivanjem početnog stanja akumuliranog dobitka ili gubitka. Uporedne informacije treba iskazati u prepravljenom obliku, osim ako je to praktično neizvodljivo.

NAPOMENE UZ FINANSIJSKE IZVJEŠTAJE

Član 26.

Napomene uz finansijske izvještaje sadrže opis, detaljan pregled ili analizu iznosa prezentovanih u izvještaju o finansijskom stanju, finansijskoj uspješnosti, izvještaju o novčanim tokovima i izvještaju o promjenama u kapitalu, kao i dodatne informacije.

ZAVRŠNE ODREDBE

Član 27.

Usvojene računovodstvene politike treba primjeniti i na fiskalnu 2022 godinu, odnosno izvršiti odgovarajuće ispravke za sve oblike sredstava, izvora sredstava, prihoda rashoda, koji su proknjiženi u glavnoj i pomoćnim knjigama RNU "Radio Brčko" shodno međunarodnim računovodstvenim standardima.

Član 28.

Ovom Odlukom stavlja se van snage: Pravilnik o računovodstvu i računovodstvenim politikama JP „Radio Brčko“ d.o.o. Brčko distrikt BiH broj: 01-194-1718 od 18.10.2018. godine

Član 29.

Ovaj Pravilnik stupa na snagu osmog dana po objavlјivanju na oglasnoj tabli Ustanove.

Broj:01-502/21
Brčko, 30.12.2021. godine

Predsjednik

Upravnog odbora:

